

摘藻堂四庫全書薈要

集部

欽定四庫全書薈要卷一萬五千三百八十七

集部

竹友集卷六

宋 謝邁 撰

近體詩

寄李商老兼柬文若季弓

有客春來傳尺書
書詞字字敵瓊琚
經時伏枕沉綿甚
異縣論交消息疎
物外高情想三鳳
眼中何物當雙魚
遙知小弟淒涼意
騎省歸來正望廬

晝卧二首

書魔纔挽睡魔推鼻息俄驚吼怒雷夢到逍遙大庭館
不堪簷外鳥驚回

剥剥啄啄無俗客清清冷冷多好風一枕本無憂樂累
何須遊宦大槐宮

青精飯

霍山王鄧兩真隱駕鶴乘雲飛九天當時服餌定何物
同飯青精三十年

從來見說青精飯晚遇真人隱訣中長恨聞名不相識
那知俚俗號烏桐

南人雖號烏桐飯過熟翻成作淖糜太極真人方未試
茅山道士寄何遲

送酒與晏如居士二首

南人釀酒詫深紅注瓦真成琥珀濃與藥相投莫宜此
急分多病晏如翁

此翁曾把春償酒醉插姚黃更乞花多病只今猶解飲

細傾聊為遣生涯

示李商老兄弟

月夜宜披宮錦袍
定知公輩豈蓬蒿
文如修水波瀾濶
人與廬山意氣高
伯氏最于三虎怒
凡兒何翅九牛毛
相逢徑欲倒家釀
莫厭尊前持螯螯

夏日遊南湖

麴塵裙與草爭綠
象鼻筒勝瓊作盃
可惜小舟橫兩槳
無人催送莫愁來

咏金來禽

枝上離離金彈丸，宜隨玉食薦金槃。
從來物以遠為貴，酷愛閩中荔子丹。

書懷

賴有書遮眼，初無客就談。
身閒惟取醉，髮短僅勝簪。
學僻今何用，囊空寶不貪。
老師行駐錫，準擬問前三。

次李商老端字韻

胸中磊磊夜光寒，霹靂驚飛在舌端。
夢去幽尋遶山麓，

詩來喜色上門闌
四時更運不停軌
萬物並流皆疾湍
兩鬢凋零壯心在
忍窮懷抱若為寬

招汪叔野

夜語僧窓雪載塗
別來夏木又扶疎
兩牛鳴處地非遠
萬竹陰邊吾所廬
兒能竊聽從忘簞
子盍徐行可當車
莫訝南鄰狂處士
摻撾傾坐一軒渠

投贈通守陳虛中

前驅負弩旆旌忙
凜凜寒風挾曉霜
人道奸藏有三穴

公知民病極千瘡
搖毫端是霹靂手
抵几還驚鳬驚行
莫向琳宮坐閒冷
太阿何事匣中藏

晚晴步塘上

漫踏斜陽堤上行
偶逢白叟問年登
去年禾乾龜兆圻
今年多雨禾耳生

鳴鳩

雲陰解盡却殘暉
屋上鳴鳩喚婦歸
不見池塘煙雨裏
鴛鴦相竝濕紅衣

聞呂居仁病未差覓使寄問

消渴文園苦病多蕭條子美卧江沱
士窮不遇古如此天實欲為人謂何
忠義名家忝申許文章秀氣望岷峨
期君煉玉煮白石色比嬰童何啻過

種竹

闢地種修竹得方緣秘經成陰向北
宇倒影落中庭直取內含素豈唯枝
闌青龍鍾玉川子猶擬抱添丁

次韻季智伯寄茶報酒三解

歡伯風流可解憂疑君此外更無求揀芽投我真拋却
不是能詩薛許州

二生相逢妄換馬我今真成酒易茶腐腸消膏亦可戒
與子服霧餐朝霞

君如張籍學古淡麗處往往凌陰何長句短章時寄我
為君翻入竹枝歌

懷鍾陵舊遊

五年二度過鍾陵馬上春風醉裏醒南浦江波迷眼綠

東湖煙柳半天青從來地域欲卑薄怪底山川終炳靈
又見徐家有高士他年重作聘君亭

湯泉

泉在法
水寺後

亂泉如沸出灣環餘燠猶霑野寺間但與山僧洗塵垢
還勝漲膩在驪山

食蟹四首

端為懷黃取醯烹豈緣多足恣旁橫焚臍未用集鼠輩
椎髓方嫌太瘦生

分付厨人苦見嫌
十臍元有九臍尖
要知其中未必有
輸與蛤蜊如蜜甜

論功直與酒盃同
何事生憎在水中
不使落湯頻下箸
終令骨醉耐春風

有國嘗憂以味亡
須知有毒味中藏
誰能不累口腹事
莫趁秋風啣稻芒

以牛膽漬槐子送董之南二首

雪霜無賴點君髻
五十龍鍾成老翁
急分槐實要腦滿

佇見頭青雙頰紅

解牛得膽大如斗投以元槐功更加來歲青袍映綠髮
不妨看盡九衢花

送王坦夫由淮南入京

王郎乘興上扁舟數遣書來寫我憂奏牘三千待金馬
卷簾十里夢揚州桃花水漲理歸楫蓮葉盃香消客愁
白髮倚門長望子細君應賦大刀頭

送安樂寺陳妙音載酒

遶郭尋春未見花不知春在梵王家
林間新翠張裙幄
席上殘紅當臉霞
興逸持杯睨雲漢
飲酣揮翰走龍蛇
主人不是陳驚座
投轄歸時日已斜

聞無逸兄下第歸

豐林分首各消魂
兄弟傷離況玉昆
初謂過都留虎脊
又令點額向龍門
往聞淮北雪花大
歸值江南梅雨昏
欲寄短書無別語
年來花柳自村村

李簿家有侍兒妙麗善歌舞諸人惜其死為賦詩

予亦賦二首

草頭朝泣露漙漙
樵歌暮歸丘隴寒
當時座上客半醉
琵琶不許近簾彈

郎子風流栖枳鸞
枳上單棲泣夜闌
窻前邂逅一笑粲
夢中猶作在時看

久旱喜雨

誰言旱魃敢奪雨
師權瀰漫溪流漲
瀾翻屋溜懸占
年豐穰稔快意滌
枰筵踈懶知何幸
茅齋穩晝眠

植菊

憔悴靈均老蕭條子美醒
飡英謀自潔摘藥恨猶青
事往成今古人亡尚典刑
老夫今白髮賴汝駐頽齡

有懷如璧道人二首

道人詩思瀉江湍乞食侯門缺
屢彈鋪褐卧雲何處去
不應投老累儒冠

每憶詩人賈浪仙投冠去學祖師禪
塵埃不染心如鏡
妙句何妨與世傳

寄王立之

坎壈修門裡蕭條處士廬
憎人玉川子憤世竹林書
家有來禽帖門無載酒車
諸公生死隔不是故人踈

二

舌本初傳強仍聞右臂枯
經春一旬卧見客二兒扶
吾道何寥聞夫君合洗蘇
世無湔浣手藥味且時需

贈別董彥速四首

人間底處異蘧廬
莫莫堂中宣定居
我尚滯留君去速

荒園三畝夢歸歟

多謝清風日掃庭與君同種菊青青開花爛熳君何在
莫忘蕭條我獨醒

欣同衆鳥託吾廬投杖行當欲索居不是酸寒孟東野
吾言能聽果誰歟

機事都捐憶大庭茅簷相對眼俱青期君別後文章健
往弔沅湘屈子醒

次韻無逸兄見示

憔悴誰能賦大招會將茵桂雜申椒
巷南鄰里頻相過
水北山人詎可邀
細酌敢謀長袖舞
苦吟空咏寸岑遙
耕耘賴有陶潛婦
不羨孫郎對大喬

次王信民寄無逸韻

詩翁索莫閉門居
珍重山陽信不踈
但報七言當玉案
何須千里駕柴車
樂天官滿應歸早
楊子家貧只晏如
他日往來隨二老
共甘盂飯與盤蔬

送酥魚頭醬菜與何之忱三首

和蜜煎膏學甕酥兒誇甘味比醍醐老夫舌本不知味
強解嘲為羊酪奴

放浪三江又五湖頭顱見醢亦何辜世無剛者不用覆
往侑一觴隨蜜酥

甕底寒蔬冬作菹春來把酒必時須庾郎鮭菜二十七
還得何郎下箸無

立夏日作四絕

雨脚連雲苦未收曉驚池面日光流田家甌裡封蛛網

即漸歌謠麥有秋

小簾含風六尺牀竹奴從此合專房
吾身瓠落都無用占得山間一味涼

熨得絺衣一番新幅巾輕軟最宜人
花時氣暖長愁夏竹裡風微又勝春

學作蒲葵扇未工手揮聊有古人風
君王別用機中練定被南來長養功

寄劉世基用世基寄之忱韻

斷堊誰能鼻不傷虎賁何取似中郎吾人身健間何濶
昨日書來喜欲狂華屋不存長念昔用文靖事金蛇雖在莫
干梁幾時燒燭留君語更向東窓置一牀

招李商老兄弟時聞權守陳公留之未聽其來

十年不見令兄弟眉宇長懷元紫芝栩栩夢魂成獨往
翩翩書札慰相思求船貨馬事應速酌醴焚魚吾豈辭
政恐孟公投轄飲惜君高論解人頤

次劉世基韻

孔世已傳三十八諸孫猶自見長身試將後謝追前謝
豈料今人媿古人華子岡頭千疊秀劉郎詩律一朝新
吾家碧澗紅泉句聊欲煩君作後塵

用前韻和董彥速

得句可傳千古意搜奇攻苦百年身河梁贈別初無對
錦里吟春復有人我已汗顏驚手縮君猶瓊樹賞朝新
從今習氣須磨盡二字唯當悟客塵

夏日書事二首

蒼虬蟠礎濕生雲翠竹搖風水有紋涼卧北窓呼不省
蟲飛遶髻夢中聞

雲峰矗立駐金鴉夢斷槐宮影未斜屏翳御風遊不返
南山空轉阿香車

余嘗會李商老於海昏識呂居仁於符離今已五
六年矣偶見二公倡和詩各次其韻一首

憶昔逢君夜雪中高談未了酒尊空清連綠篠今輸我
白壁黃金政負公渭水流清終異濁池花變碧舊曾紅


欲評此意君何在長是蒼茫立晚風

右寄商老

維舟濁汴偶相逢彈鋏歸來四壁空耕道十年常九潦
謀身一國是三公似聞諷諭能知白豈但詩詞要比紅
申國凜然生氣在故知郎子有家風

右寄居仁

竹友集卷六



總校官庶吉士臣張能照

校對官編修臣莫瞻菴

謄錄監生臣和其聲

欽定四庫全書薈要

集部

竹友集卷

七至
十

詳校官助教臣謝登雋



欽定四庫全書薈要卷一萬五千三百八十八

集部

竹友集卷七

宋 謝邁 撰

近體詩

玉茗花二首

佳園昨夜變春容
清曉驚開玉一叢
素質定欺雲液白
淺妝羞退鶴翎紅
似聞金谷初無種
欲畫鵝溪恐未工
底事餘花避三舍
孤高元有史君風

謂魯公也

騷人浪說麻源谷本在風流刺史家直與瑤林共高徹
可須梅影鬪橫斜芳尊莫待紅粧賞幽艷長令烈士嗟
憑仗邊鸞折枝手應宜展障玉鴉叉

謾成

年來任運學騰騰愛酒還同醉李僧痛飲亡何緣客至
時奇不惜遶村行簷間燕雀新聲好門外池塘春水生
曉起坐窓無一事捲書南望見高稜

飲酒示座客

身前不吝作蟲臂身後何須留豹皮
劬勞母氏生育我造化小兒經紀之
牙籌在手彼為得塊石支頭吾所師
偶逢名酒輒徑醉兒童拍手云公痴

和李智伯金石臺不見舊題之作

瘞鶴書蹤逸少齊華陽長使後人迷
姓名不得芙蓉手何用金牛捧硯題

復憶高人張季鷹每將盃酒勝榮名
登臨叔子緣何事湮滅無聞一愴情

悼亡

舊聞林下趣既見即心降月冷同秋夢燈寒對夜窓孰
知身是幻深念涕如江仰嘆朝飛雉微禽亦有雙

二

三公吾豈敢曾為忍饑寒擬聽零簫雨潛悲首蒼盤煙
雲昏壁月霜露殞香蘭佇立東風泣忘情良獨難

三

去作三年隔來歸二載餘臨風還念汝傷女更憐渠惟

悴衣圍減飄零鬢髮疎吾今多病久誰付茂陵書

呈無逸兄

蕭然環堵獨何有自謂過人唯一邱野性定為滄海客
妙齡須寄道山遊江寒沙靜鵲鷁晚雲濶天低鴻雁秋
休歎烏衣成往事一尊相對且忘憂

寄桃鄰居士

桃鄰野客無消息寄食招提豈定居倘有龐公知德操
何須程鄭識相如食魚他日勞彈鋏痔今人剩得車

流落生涯俱寂莫因風時遣一行書

寄無逸四首

三足祥鳥曾集冠生平菽水奉親歡從今五鼎應無補
不可奈何君自寬

聞說潘郎窘食貧何年會面慰艱勤北風如有齊安便
為報相思頻夢君

故園風物長如舊松栢叅天六月涼岑寂北窓風雨夜
獨吟詩句遶胡牀

浩蕩漳江瀉碧漪
西山清絕助新詩
好因歸雁傳佳句
要見羊何共和之

觀李伯時陽關圖二首

坐對丹青傷別離
汨和朝雨想頻揮
道邊垂柳年年在
看盡行人長不歸

春草春波傷底事
青青柳色最消魂
龍眠自有離家恨
貌得陽關煙雨昏

秋興

雨隔千山暮風驚一葉秋
朱顏傷露槿青眼賴沙鷗
畏酒游揚夢因詩點染愁
有懷誰與語多病獨登樓

聽曹道士彈琴二首

淡泊綵絃誰與聽
試開塵匣寫幽情
琴中自有無窮怨
彈出離騷意外聲

小窓疎箔列仙家
彈盡遺音晚影斜
賀老當年定場屋
虛將妙曲付琵琶

寒日出郊

水晴鷗弄影沙軟馬驚塵密竹斜侵徑幽花亂逼人深
行聽格磔倦憇倚輪囷往事悲青塚年年芳草新

寄洪鴻父

兒時訪道章江上燕雀羣中見阿鴻南浦飛雲看畫棟
北窓欹枕颯涼風讀書長憶登山勝作尉聊甘食齋窮
想見咏懷非一首鈎章棘句定能工

有懷潘子真

冲和菴裡潘居士旅食京城久不還玉唾銀鈎長在眼

瑶林琪樹未承顏
大門曾是鄭嚴輩
吾子却居夷惠間
想見紅塵車馬底
夢魂隨雁過西山

食菜

道人真是伊蒲塞
頓頓園蔬入饌來
紫菜寒菹參薤韭
黃橙苦酒伴鹽梅
蒸豚不羨貯人乳
飯豆亦能羹芋魁
但恐酪奴不解事
攪令枵腹轉春雷

暮雨二首

溜渠鳴玉雨成霖
春草池塘數尺深
後院落花人不到

無聊獨下海棠陰

晚雨墻東暗綠槐
清陰庭院鎖莓苔
委階紅藥將春去
貼水清荷與夏來

春日黃梅花二首

臘梅初與雪爭妍
素艷寒香亦可憐
政使北風吹得盡
一枝金蓓始嫣然

傍人如笑不勝妍
曾是尋芳向臘前
縱使遊蜂能拂掠
含酸結子為誰圓

梅花四首

姑射神遊閱九關
水精宮殿不勝寒
下窺人世生成想
故作梅花與俗看

清曉微開淺淺黃
蕭疎無奈北風涼
幽姿不許人窺見
故向寒林度暗香

薔薇露染玉肌香
疎影寒光照野塘
長使詩人動幽興
不妨桃李鬪春粧

冷香零亂點寒莎
眼底愁生萬種多
收拾餘芳無處惜

只傳佳句似陰何

送都仲獻

酒曹懷璧暫投閒
俄許朱轡未賜環
殿閣涼生應在眼
宮門騶唱合趨班
鳳皇觀德翔千仞
虎豹窺人礙九關
只恐蒼生傾望久
未容投綬老家山

寄題長沙高善時醉月堂

亂山岑秀繞湘濱
君築郊堂底處村
南國戈矛真夢幻
醉鄉風露別乾坤
平生不負南樓興
何日能同北海尊

聊欲揮毫書楚些憑君招取獨醒魂

與江君佐遊五福寺觀竹二首

老子平生與竹羣清風洒濯勝三熏江郎定自興不淺
共打僧門尋此君

小池環插碧琅玕氣韻蕭梢六月寒一夜清霜羣木落
獨留孤節與君看

吳彩鸞寫真

天上鳳皇難獨宿人間翡翠本雙栖丹青不與文簫共

誰遣雉東迷雀西

戲咏鼠鬚筆

編鬚捋取蝟毛磔裁管縛成雞距長誰言鼠鬚不足齒
也復論功翰墨場

山間四首

籬落秋花未得霜嫣然一笑媚秋陽可人風味撩詩興
不記姚家宮樣黃

野老緣岡拾墮樵溪童收網度橫橋高懷盡在行歌裡

豈信人間有市朝

未羨顏生樂一簞一簞懸磬若為歡
有田如使楊雄足亦學前賢在澗槃

舉案齊眉老孟光
隱居無計可須忙
殘年但使糟床注
亦付生涯與醉鄉

移松二首

古貌蒼髯十八公
巍巍獨出衆材中
朝來挽致茆堂下
為我商量送好風

河出崑崙派九州屹然砥柱立中流蒼松若比邱山重
豈但回頭費萬牛

次韻吳民載告別覓酒

君詩起予者百遍為君開世俗唯何甚予心不可諧獨
思南去楚衆欲北之回何處可休影期君歸去來

二

齊下老從事相逢青眼開有朋方悃欵得汝更諏諧老
興此非淺後車君與回嘉蔬實空甌并遣木奴來

偶書二首

大儒讀書如布穀小兒據几如王孫道人竟日無一事
卧看前江烟雨昏

平生蹇吃不解語終日坐窓從客嘲它年若使登要路
定被人譏無口匏

題陳先生華山高卧圖

落葉開花秋復春睡中榮悴豈關身那知五起雞三唱
亦有寒窓不寐人

和董彥光立春日二首

梅蕊飛翻柳色新
雪泥乾盡已成塵
愁看節物獨驚眼
醉吐詩詞君可人
藜杖應門原憲病
鸛裘貫酒茂陵貧
朝來似有飛揚意
可但無情草木春

交情自昔白頭新
富貴移人或望塵
顧我喜求方外士
得君端是眼中人
謫仙詩富舊無敵
東野囊空今不貧
已遣摻摻縫古錦
共搜佳句賞新春

彥光示詩有釋氏之語復次韻

歷眼浮榮逐日新誰知澄寂本非塵
吾曹例作區中士此日全輸世外人
空裡華生均是病衣中寶在却憂貧
是間枯淡君姑置且辦芳尊醉早春

何之忱用前韻示詩復次韻

楊子牢愁更美新賈生悲鵬在承塵
忘懷久已栽萱草行樂尤欣見玉人
邂逅題詩聊可意平生嗜酒豈憂貧
明年剩作顛狂計劇飲高歌莫負春

從陳妙音覓酒二首

雪窓痴坐撥寒灰萬斛清愁掃不開排遣此懷皆底物
憑君催送麴生來

長恐閨人抱頸羞何當更脫鷓鴣裘試煩郎子傾家釀
不用平原老督郵

次韻董彥孚獨卧逸堂之句

遶舍檀欒五月涼歲寒高節亦難忘期君鴻鵠應高舉
顧我虬蜉豈自量索價舊曾希少室荷鋤猶可繼柴桑
虛堂若許連床卧待看風吹細細香

送黃柑與彥孚二首

殘臘纔經一番霜
青青三寸作金黃
故園兄弟懷思我
特地分甘到草堂

手折奇苞遺細君
更思特送逸堂人
甘寒定可錦繡口
看吐新詩泣鬼神

過金山下作

楊子江中風浪生
小舟如葉任歌傾
槳搖齊指金山寺
霧暗初疑鐵瓮城
絕頂迥分雙塔秀
層樓危立一僧清

他年來訪結菴地吾與此江春水盟

獨登有美堂

龜趺雙峙日星懸讀罷憑闌心浩然繚繞峰巒浮野色
參差樓閣起晴烟湖光淨照山間寺江浪遙連海外天
安得翰林風月手一時摹寫入詩篇

雨中漫成四首

東風渾作勒花寒寂寞林塘不受看玉版鶴翎俱未識
梨梢空有淚闌干

向老逢春懶問花
惡風吹雨故斜斜
一城桃李應漂盡
不到城南韋杜家

一樹山礬宮樣黃
曉風微送雨中香
鼻端空寂誰知許
莫怪雄蜂取次狂

纔見花飛掃不開
只今青子落莓苔
當時一笑冰雪面
曾動揚州詩興來

送王山人

秋風蕭瑟賦歸歟
此去懸知金有魚
我亦羨君無奪糈

長沙終負過秦書

竹友集卷七

欽定四庫全書薈要卷一萬五千三百八十九

集部

竹友集卷八

宋 謝邁 撰

古賦論辯序記

懷故園賦

余故園之幽寂兮拓荒榛而經始面銅山之齒萃兮挹
蕭晨之爽氣擢天矯之蒼松兮參虬龍之遊戲峙便娟
之修竹兮儼萬夫而環侍築屋其間兮將以隱居而求

志盤旋不出兮殆不知老之將至夫何漂泊異縣兮莽
流萍之無蒂山岑岑兮植壁泉涓涓兮鳴珮玩山水之
清佳兮亦足以樂飢而忘味雖信美非吾土兮昔之人
所以登樓而橫涕嗟三畝之寬閑兮豈一錫之莫置畦
西滋乎秋菊兮墻東繁乎春薺晚食可以當肉兮徐行
可以當騎冬裘夏葛苟不完兮寧紉荷而製芰效鹿門
之俱隱兮逝優游而卒歲辟纁猶可以易粟兮吾豈從
墻間之祭繫古人之不食兮獨貿貿然而蒙袂事有感

於予心兮聊抽毫以寫志

竹夫人賦

淇園之下渭水之濱有物森然其色青青刻畫以檀欒
嬋娟之狀俎豆以碧鮮玉潤之名有匠若睨而嘆曰是
物也非松非桂非楸非梓孤潔似介一何高士溫潤似
德一何君子是必良材者也于是伐以斯棘之斧運以
斲泥之斤製而為器強名曰夫人竹友居士得之而喜
曰夫藻局璇室朱宮玉闕延羅幌之清風掃象牀之秋

月神女詫其雲雨姑射逞其冰雪有談夫人之高致誦
夫人之貞節雖欲奉敝帚以享金無乃獻璞玉而遭刖
則吾方遊息于瀛州方丈之上結廬于銅陵碧澗之下
以蛾眉曼綠而伐性以錦衾角枕為階禍或偃息于風
櫪或裴回于涼榭炎曦鑠石之晨碧月澄空之夜與夫
人其同夢感莊周之物化俄而商氣聿興涼颼四起葉
翻翻而墮地蟲啾啾其入耳掛蒲葵于墻壁委纖絺于
篋笥童子造予而請曰今茲秋兮歲其將換御冬須狐

白之溫曝背幸朝陽之暖唯斯之無所取材願以結厨
人之爨居士曰噫子獨不聞夫伐著而哭亡簪者耶子
亦不見夫采葑而遺下體者耶物或故則不忘材有用
則不廢豈眷顧乎姬姜乃棄捐乎憔悴自古亦莫不然
吾又何增乎歔歔雖然吾方念此欲以憩膝而休臂童
子出居士乃據竹而歌曰鵲姑南北兮雨蕭蕭匡林之
上兮吾與汝其逍遙

過隋論

隋高祖藉椒房之親假黃鉞之制秉國政以輔少主知周祚之將亡有革命拯民之意舜禹禪讓之心當是之時中外側目權貴忌之于是詔五王劍履上殿以慰安其心親造趙王之第陰欲觀其行事而陽示不疑乎持太阿之柄雖陰謀竊發曾莫摧其鋒矣高祖既有天下明政刑修守戰之具欲以渾一區宇西斬土谷渾北破突厥韎鞞重譯而納貢高麗稽顙而入朝命爪牙之將驅熊虎之師旗旃樓船千里相望大軍南渡日陰未徙

而亡陳天下已定消兵偃武有臨朝願治之心躬覽萬
機日昃不暇衣服器用崇尚樸素遣使者以問疾苦引
乘輿以避老幼罷魚龍之戲痛雅頌之聲不作則當時
之士有牛弘許善心姚察虞世基之屬承其詔欲舉先
王之隆典修明五禮則蘇威薛道衡王邵之徒當其任
如使高祖得行其志則堂堂乎隋不可與周陳同年而
語矣惜乎高祖有為天下之志而無為天下之量操持
大器恐天下之並起而軋已譬如閭巷窶民一旦有十

金之藏意其有擔囊而趨者惴惴恐惕夜不能寐彼獨不知富家父亦自有體耶當此時藏緯候圖識造兵器有禁客舍無公驗者坐及守令朝廷之上言未卒口而鐵鎖隨之廢太子勇立煬帝其危亡之兆已萌而高祖不悟也此其過在于無為天下之量所以無為天下之量者何也忠厚不崇刻薄而善疑也古之帝王刻薄而善疑者莫如秦始皇其疑之愈深隄防愈密而患輒隨之而生始皇收天下之兵聚之咸陽銷鋒鏑鑄為金人

十二蓋疑天下之人有持兵而反者然不知陳涉之起
斬木為兵揭竿為旗奮臂一呼而金城不守也秦法羣
臣侍殿上不得持尺寸之兵諸郎中執兵陳殿下非有
詔召不得上蓋疑左右之人有包藏禍心者然不知荆
軻之匕首乃發于燕督亢之地圖而無目之高漸離猶
能舉筑以撲也事有曠千百年而合若符契者秦隋是
已秦始皇刻薄而善疑傳之二世而亡隋高祖刻薄而
善疑傳之煬帝而亡借使此兩君崇忠厚之德修寬裕

之政以懷來天下後雖有淫荒之子孫宗廟尚可以延
漢高帝不過泗上亭長唐高祖亦北面而稱臣耳其能
取天下而有之耶故曰亡秦隋者非漢與唐也秦隋自
亡也詩云殷鑒不遠在夏后之世是以聖人為天下稽
之往哲考之前事察治亂之由循寬猛之宜仁風德澤
搖蕩浸灌人心歸之如父母措天下于磐石之安誰得
而侮之耶

孝辨

或問孝曰頃步不忘親于食之間不忘親孝子哉曰有
食于稠人之坐饋之羊舍而弗食言于衆曰羊甚美吾
有念母之心焉請以遺之或謂是詐而已矣是取名而
已矣子以為何如曰是孝也食之甘者念其親此人之
情也非孝之難也穎考叔食而舍肉鄭莊公母子如初
桑下餓人食而餘其半趙盾遺之簞食與肉夫穎考叔
非誠欲以遺母而桑下餓人又未必其誠孝也莊公因
而有感宣子不以為疑此人之情故也或謂是詐而已

矣是取名而已矣亦豈無人之情哉斯人之說勝吾不
忍孝子之忘親也今人知愛其子必朝暮求其所好以
悅之豈愛親不若其子歟噫人皆知易其愛子之心以
愛其親天下豈有不為孝子者哉或人瞿然曰有是哉
子之言是也然則孝子之心其亦可知也已

送邵尉序

大凡有心于得而得者其心勞而所得也不完唯無心
于得而得然後其心泰然而所得者亦多莊周列禦寇

之徒其言荒怪渺莽而其要一歸于無心故嘗謂海濱
之人機心一萌則鷗鳥不下而索珠赤水之北者惟象
罔能得之金谿尉邵公弱冠登進士第仕宦偃蹇不達
垂二十年猶尉嵒邑平居無事種學自娛未嘗飾一言
以求知于要人之門其于窮達得失之際泊如也為尉
之明年盜嘯于境探丸為彈者衆吏胥以聞公徐應曰
除盜吾職也其可以稽吾行耶於是衣戎服帕首袴鞬
鞭馬而出不淹日掩羣盜梟之四境肅清枹鼓不鳴部

使者錄其功上之朝未幾授宣義郎而使者又論其餘功其賞猶未已也邑之有識之士相與言曰往時尉吾邑有心于賞者往往交通舞文吏以陷人于死賞未及行而惕惕然意其卧不安席也今公無心于賞而刑者自不寃雖一日九遷其官可無恨公丹陽人也家世以儒術顯其為人號稱寬厚長者而貌偉然古所稱燕頤虎頭飛而食肉者異時勒銘燕然亭功樓蘭韞弓橐矢雍容廊廟之上其可量也哉邑之士望公者如是將因

辭以達意故于其行也屬予為序以贈其行云

狄守祠堂記

撫于江西為富州其田多上腴有陂池川澤之利民飽
稻魚樂業而易治歲比不登道殣者衆破貲鬻田宅者
十室而七八持妻子而庸直者十室而三四其輕俠少
年無不推埋掘冢白晝劫人于市寢以不治聞太守狄
公下車之初行其獄桁揚者相推案租賦逋負山積登
進其民皆疲瘵餓羸之餘公喟然嘆曰民弊如此其可

以苛急治耶于是繫獄者薄其刑負租賦者緩其期其
為政寬而不弛其出教條簡而易遵一年而服三年而
變三年而有成州父老相與謀曰完我身于囹圄鞭笞
之中俟我黎老于凋瘵之後蓋公之德也公歲滿且代
去盍立生祠以慰我民之思乎皆應曰然他日又相與
謀曰祠易為也將請于公立于州之便坐則出入有禁
不得朝夕拜祠下欲便其出入且奉嚴潔宜莫如僧舍
州之僧舍數十其屋宇靜深莫如景德禪院院之主僧

又有才智能辦其事于是富者出財技巧者出力不日而告成既落之後咸來請于余願有記夫沒而犧尊太牢不如生而卮酒一肉也沒而廟食百世不如生而一朝奉嘗也公之旌麾未去民已圖其像而祠之可以為公榮然此邦之人思公無窮公去而羽儀于天朝豈能忘情于此邦哉幸公之異日持節再來其德意之厚政事之美雖不敏尚能為邦人頌之公江陵人唐宰相梁公之苗裔家以儒術吏事顯公能世其家者也

適正堂記

昔之儒者正君臣父子夫婦長幼之倫談仁義禮樂教化政刑之具自以為至矣學老子者從而非之以為博而寡要勞而無功吾師之所傳者不如是要以無為清淨為務亦要勞而無功

闕

自以為至矣學釋氏者又從而非之以為久生近乎貪
養形近乎愚吾師之所傳不如是以寂滅為宗以無生
為樂夫三者之相非豈有既乎然今之世學釋老者競
非吾儒其言汪洋浩渺足以駭世絕俗而儒者反取釋
老之言以明六藝之學嗚呼安得孟軻楊雄韓愈之徒
出而排之使吾聖人之道廓如也吾友吳迪吉作樓于
其居第之西其下闢以為堂圖孔子荀卿揚雄之像于
其間又取韓愈原道之書寫于其壁而名其堂曰適正

蓋取揚雄法言所謂適堯舜文王為正堂者也。迪吉屬
予為記，且使道其名堂之意。余謂迪吉子坐于中堂，瞻
數子之容而思其學，觀原道之書而詳其義，則堯舜文
王之道參乎其前矣。雖然，理固有待物而明者，嘗試登
君之樓以望長江之流，浩浩乎其必歸于海矣。乘舟而
往，順流而不止，雖欲至海可也。航斷港絕潢者，能若是
乎？迪吉曰：我知之矣。泛長江而歸乎海，是適聖人之正
道者也。航斷港絕潢，是適諸子百家之他道者也。我知

之矣子其為我書之余曰唯唯

竹友集卷八

欽定四庫全書薈要卷一萬五千三百九十

集部

竹友集卷九

宋 謝邁 撰

題跋贊頌

讀仁宗政要

仁宗皇帝在位四十二年深仁厚澤海涵天覆百姓鼓舞而不知及夫鼎成龍駕望白雲而號者徧乎天下父老至今能言之往往咨嗟歎息至有泣下者蓋感人之

深人亦不自知其然也孔子曰大哉堯之為君也唯天
為大唯堯則之蕩蕩乎民無能名焉書載堯之事備矣
至所謂大而民無能名者書亦不能名也余讀仁宗政
要求其所以感人之深殆不見其迹然從其所任用者
觀之庶幾可概見矣盛哉慶厯之中二三大臣同在廟
堂洋洋乎忠厚之風藉使生逢其時雖掃舍人之門所
欣慕焉

書元稹遺事

余觀司馬遷遭李陵之禍盖出于無辜竊怪在廷之臣
無有爭之者而遷亦自歎恨以為交遊莫救左右親近
不為一言故作史記之書大抵欲寓其憂憤之懷為晏
平仲列傳書其解左驂以贖越石父之罪而卒稱之曰
假令晏子而在雖為之執鞭所欣慕焉余讀其書至此
三復其辭而悲之使漢廷臣有一晏平仲豈忍坐視遷
之無辜以受刑而不一引手而救之耶及觀韓愈傳見
王庭湊之圍牛元翼也朝廷命愈使而人莫不危之是

時廷湊擁強兵恣睢跋扈天子遣一介之臣投餌虎狼之口若萬一無生還理得不為朝廷失一賢士耶得不貽天下後世笑耶然當時公卿大臣無為愈言者獨元稹言韓愈可惜穆宗亦稍稍悔之嗚呼誰謂元稹而能如是哉世之君子少而小人常多小人不特偷安于朝又沮毀以害君子歟故君子一有受其害從而擠之者皆是也而稹乃能知愈之賢不忍視其身之危將無援以死且重為朝廷惜之是亦可謂難能也已觀稹之于

愈如此使其在漢廷必能出一言以救司馬遷之禍使
後世復有司馬遷亦必特書其事且願為之執鞭焉使
作史者乃不載之本傳而特見于愈事之末是可嘆也
稹與白居易同時俱以詩名天下然多纖艷無實之語
其不足論明矣觀其立朝大概交結魏弘簡沮抑裴度
之言以浮躁險薄稱于時至于知賢救難奮激敢言凜
凜有古直臣之風夫以元稹而猶能如是又況不為元
稹者乎

書賈誼傳後

賈誼說文帝以諸侯强大天下之勢如病瘡失今不治必為痼疾文帝入絳灌東陽馮敬之言未盡施行而誼亦不幸死矣鼂錯得幸景帝乃請諸侯之罪過削其支郡于是七國連兵西鄉以誅錯為名吳王謀反已兆于高帝之言豈為錯發哉袁盎一說錯遂滅其宗族悲夫使誼不死景帝之時絳灌舊臣無在者誼必得志得志必盡行其策則鼂錯之禍誼其當之耶誼之不幸而死

乃誼之所以為幸也禍福倚伏無形其不易知如此班固稱誼天年早終雖不至公卿未為不遇也固亦有見于斯耶

書鄭當時傳後

司馬遷稱鄭當時每朝候上間說未嘗不言天下長者其推轂士及官屬丞史誠有味其言之也當此時諸公翕然稱鄭莊而後世言推賢好善者亦必曰鄭莊云然觀武帝時莊所進言見任用者東郭咸陽孔僅其人也

武帝內興宮闕外事邊陲言利之臣析秋毫而天下蕭然不聊生成陽僅擢于鬻鹽大治其言利殆與桑弘羊等此其為害于天下豈少哉謂莊好言長者而長者固若是耶抑所言多長者而武帝不用也方魏其武安東朝廷辯灌夫汲黯與莊同是魏其而莊獨不能堅其說武帝詆以為轅下駒司馬遷亦言其趨和承意不敢甚引當否蓋莊天性樂善至上不能用則亦順旨而從諛嗚呼誰謂鄭莊推轂士為足尚耶觀其所進者二人卒

為天下蠹然則衛將軍之于士大夫無稱焉賢于莊遠矣

溪堂先生畫像贊

并序

有好事者畫溪堂先生深夜幅巾蔭喬木坐磐石目
飛鴻脫屣石上濯足于懸瀑之下或者見而疑之竹
友居士從而贊之曰

以君為在山林耶炯然之容如珠玉儼然之衣有表襮
以君為在市朝耶泠然之泉可濯足翻然之鴻與寓目

盖用之而行則服鑾輅被羈絡而為奉輿之駟舍之而
藏則脫斤鋸老溪壑而為蔽牛之木疑君者滔滔皆是
而知君者唯我獨也

雙栢頌

并引

子謝子有讀書之館有雙栢峙于庭下枝葉茏然予
顧而譽之且曰世之君子遭時斥逐守道不變盖有
似乎茲栢昔屈原作橘頌以自況橘固美材然冬夏
青青唯松栢獨則橘斯為下矣頌雙栢以寄吾意云

后皇植物栢嘉樹兮亭亭雙峙季孟序兮繁枝修幹
庭闕

竹友軒銘并序

謝子闢軒于書館鋤荒剔穢植竹數十本游居寢卧
其下竹貫四時而不改柯易葉君子似之故命其名

曰竹友而為之銘銘曰

層氷峨峨萬木被雪我觀茲竹勁氣貞節桃李其華燧
燧中林我觀茲竹淨綠寒陰惟竹有材可管可籥斤斧
勿侵以保天年我掛我冠與竹燕休養成嘉實鳴鳳來
游

何之忱抱瓮園銘

彼愚而夸飛宇綺䟽雕鏤朱丹遺巧則亡此哲而窮蓬
戶桑樞是豈固然今古一途我觀何子孝友愉愉不為

於陵離母以居總角寄巢迄于霜鬚其勤其艱以有屋
廬環堵蕭然風雨僅除爰開小園荆棘自鋤前有瓜田
後有芋區早韭晚菘可鬻可殖斑衣兒啼將奉板輿萊
嫗華巔以翼以扶殺鷄無羸客至飯蔬畦丁晨告雨物
不濡跼蹐行汲色賴力飭胸中純白豈曰未愚海客有
心鷗鳥凌虛機春原簞智則有餘是皆機械有道所誅
君寧捐捐用力抑將謂桔槔之不如乎

陳無惑宴室銘

子陳子宴坐靜室牀敷居中文史在前蠻觸干戈日鏖
于外而吾心澄寂若止水之淵朝于是夕于是出于物
構而須臾之間復此乎盤旋其視鼻端寂然如閉息之
龜其遺形骸杳然如委脫之蟬能如是坐之雖維摩詰
見之其敢曰不然若夫身居一室而心遊四海是猶圈
虎豹而檻猿狙也其誰以為宴耶

碁局銘

世傳神仙奕碁山阿樵者旁觀斧爛其柯謂堯教子此

理則那不有博奕猶賢乎已為之不止牧猪奴戲不叩
自警曷告子弟

尺銘

童子適市老僧不欺較短量長惟爾其無私

竹友集卷九

欽定四庫全書薈要卷一萬五千三百九十一

集部

竹友集卷十

宋 謝邁 撰

墓誌祭文

董彥孚墓誌銘

君字彥孚諱草姓董氏家撫之金谿贈承事郎諱某隱
居田里孜孜樂善不倦于君為曾王父隱君生承議郎
通守虔州諱某清修刻苦居官守正不撓工詩博學至

老未嘗一日廢書虔州生信州玉山主簿諱某越州司
戶叅軍諱某同年登進士第以經術文章擅場一時稱
江西兩董越州早亡玉山性剛狷不肯俛首事大吏以
是宦不達玉山生君三歲姆抱觀壁間書一日弄筆寫
十餘字乃壁間所嘗見者玉山驚異之四五歲誦書如
建瓴水賦五字詩有文采可觀稍長下筆奮迅如風霆
聲觀者辟易虔州拊其背曰異時以文學大吾後必此
兒也後數從進士試其為文汗漫喜出怪奇語率不合

有司繩尺益放情為歌詩其悲歡譏罵一于歌詩見之
年四十一以卒時政和二年六月甲子也以其年十一
月甲子葬于興源山之側王母壽昌君曾氏春秋高君
左右事之常得其歡欣于是壽昌君哭之不成聲曰天
乎吾老而見嫡孫之亡也室王氏二男回騫皆童穉四
女長許嫁幼在襁褓二季需曇才士也集君歌詩五百
篇藏于家撫其孤且教之君其必有後乎余娶君之姑
知君最詳為銘曰

挾才以為鏃援經以為弛惜榮名之不立撫輶服而號呼季也懷之羽翼其雛尚克奮飛釋憤幽墟

吳伯俞墓誌銘

余昔讀書龍泉之陽見其地肥衍有稻梁魚果蔬之饒意其必有素封之民居于其間面山而帶溪氣象清曠又意其必有俊秀之士出焉既而識吳君伯俞君語余曰吳代自高安徙臨川卜築于龍泉溪上不知其幾年矣吾祖吾父皆力穡為善不倦逮吾治生而資益奇贏

吾是以構屋買書延四方之才士使吾兒從之游已而
見其子果皆好學而文也君以政和四年三月癸卯卒
壽六十有八以其年十月辛酉葬于潁秀鄉之仙游源
其子克明錄其實衰經走百里乞銘于余辭之不可遂
序而銘之君諱仕舜伯俞其字也曾祖諱道玠祖諱文
侃考諱仁遂君喜觀書尤長陰陽五行之說善飲酒縱
謔客至無不罄歡歲饑低穀價以惠貧民疾病不能謁
醫者為發藥治之

闕

頗衆有負子錢數百萬者焚其券弗問有娶其兄之子
貧不能自給者分田以養之其恤于鄉里厚于宗黨類
如此三男子曰克開克明克從孟前君七年卒仲初授
衛州耒陽縣尉季嘗貢于辟雖先室饒氏繼室周氏一
女子嫁進士饒擴早卒孫男四人曰邵曰邠曰郁曰郊
孫女三人孟既嫁而卒餘未筭銘曰

富好行其德知其志之無驕也德未饗其樂知其家之
有後也嗚呼百歲之後近其墓者勿樵也

朱夫人墓誌銘

夫人朱氏撫州金溪人贈宣德郎諱彥國之孫處士諱獻可之女同邑人陳筴君謨之妻為職方員外郎出守濠州諱獻明者夫人之叔父也夫人以大觀四年七月戊申卒享年三十有七以政和元年十二月丙午葬于歸政鄉交龍原男三人曰德厚曰處厚曰躬厚女四人長嫁進士周均餘皆幼夫人喪父母蚤王母崇德君憐之不許嫁凡兒濠州承崇德之命擇所宜適以歸君謨

夫人為兒時柔順稱于宗族及為婦為妻益以孝敬聞其姑曰吾為陳氏繼室嫠時尚少左右就養俾吾安其室不惟予子之孝亦予婦之力也君謨曰吾治家有法為士無過行吾妻每有助焉夫人之卒也其姑哭之哀甚君謨日拊棺哭不絕聲出與賓客語泣然不知涕之交頤也或謂君謨賦悼亡之詩足以寫其悲懷不然出遺服櫛佩圖佛以授浮屠亦足以塞悲二者君謨皆不暇為乃日夜悲傷憂懣至于病猶未已雖伉儷之重君

謨所難忘亦夫人之賢實使之君謨病且愈叩余門泣涕言曰吾妻葬得日願有銘余既夙聞夫人有賢行于是撰次其事又嘉君謨能篤于夫婦之恩也乃序其情作哀詞以弔之使鐫諸石內之壙中以當銘其詞曰

朝之容蹢蹢兮于豆于觴夕之容翼翼兮我襖我裳一日棄余而往兮莽不知其何鄉姑當饋而賁涕兮兒啾啾而在傍我夢平生兮宛若覲其清揚既覺而非兮徒有淚其浪浪身如朝露兮何者為強餘生纔幾兮憂又

克傷凋蘭瘞玉兮何日而忘

朱夫人墓誌銘

金溪陳大聲將葬其妣以其父命來謁銘且曰大聲從君伯氏溪堂先生游又辱知于君溪堂工文詞銘貞士烈女節行不誣吾母葬得日而先生忽謝世微君誰宜銘者不得銘其何以掩諸幽余不得辭乃諏其家世行實序而銘之夫人朱姓撫州金谿人朱氏大家有宦于朝為顯人而仕于州縣者相望也夫人祖諱宿考諱宗

良皆隱德不仕夫人年十八歸為陳師堯聖徒之配于是姑老矣夫人于倫次為冢婦事姑孝謹至于疾痛痾癢無不察而家事無大細皆親之其從夫以敬其訓子以嚴其友娣婦以和其御童僕以恩其言其動無纖毫不本于誠者故陳宗無疎戚莫不敬愛之姑捐館舍既終喪夫人以家事委諸婦而聖徒亦放曠樂酒不躬事生業歲時諸女來覲孫子侍側菴講鞠脰舉觴交獻迨其暇豫舍飴弄孫蓋將以佚樂壽考終焉而夫人不幸

止此其可哀也夫卒以政和二年二月甲子享年五十
二以其年十月巳酉葬于歸政鄉之柳原男三人大聲
大球大信女三人嫁彭通一黃馭許獻可子與壻皆從
進士舉孫男女九人皆幼銘曰

婦德幽幽孰傳其譽子行表表乃知其母壽不稱德子
孫其昌宰木百圍無或壞傷

祭無逸兄文

嗚呼羣從兄弟孰如兄賢豈特羣從此邦則然猗歟幾

希宣惟此邦世之偉人其心則降兄與信民猶壁一雙
庚寅之秋汪子云亡自楚訃聞衆為盡傷豈知此來兄
又宅窻僅閱三稔乃瘞連璧凡今知聞孰不需臆某也
晚生少兄七歲讀書相從兄冠我穉凡視我為不曰兒
戲教之誨之以俟其成及我既冠待以友朋歡然之思
不唯弟兄我壯益窮祿無升斗客于下邑計以餬口兄
書日來問我安否去年從兄走于京師風雪修途間以
凍饑迨其旋返病不能支我侍兄行逆旅謁醫操藥饋

漿鮮克以時從者息肩哭聲在幃嗚呼我不忍思尚忍
言之兄之詩文為世所珍廣微之書以遺後人欲銘其
藏必得名世我未往求書石以識載我以尊酌以祖行
肺肝塌然有淚如澠

祭董彥孚文

嗚呼彥孚學足以入官議事而無祿以代其耕智足以
發奸摘伏而無地以施其巧顧世之暗聾或施施而得
志而君之智術乃皇皇于一飽衆雖欲殺而莫憐子亦

從嗔而須齧頃駕言而寓居嗟識面之不早我每唱而
君和子或可而予否初疑鑿杓之難合卒若酸醎之適
口共娛嬉于文字亦殷勤于盃酒方子之疾我獨執其
手方子之歛我獨扶其柩始也哭子以詩自謂足以寫
哀既而銘子之藏人或意其不朽適涓辰而啟殯復撫
事而垂淚夜漫漫而莫旦魂杳杳而何之酬一觴而告
訣庶彷彿其來思

潘邠老哀詞

予離羣而處獨兮望古人而求友君被褐而懷才兮卧
何邱之林藪賦幽懷于秋夜兮雖愛君而不見託筆墨
以寫心兮蓋定交其已久歲乙酉之將盡兮始識君于
大梁面蒼蒼而髮星星兮何茲時之不偶君曰無傷兮
繫吾道則然相從于漏屋之下兮日賦詩而飲酒越仲
春之未望兮我乘舟而東去君躊躇而不忍別兮步河
堤而攜手念會合之難常兮嗟形影之乖離既黯然而
分道兮常睽焉而回首謂別君其幾何時兮曾書問之

不通驚凶訃之奄至今為投箸而噎嘔予固知自古皆有死兮誰能免夫牖下夫何奔走于道路兮竟死于奴隸之手矧比年之凋喪兮鬼然皆國之楨君雖學而未仕兮天又寇而莫之壽意君死而無恨兮從諸公于九泉奈生者之惻愴兮謂天意之莫究維君之文兮予謂不朽于今之世兮祇以覆瓿不顯于今兮固傳于後嗚呼君身槁壤兮君名星斗

竹友集卷十

竹友集跋

臨川謝逸字無逸其文章學業為縉紳推重以其所居溪堂稱之曰溪堂先生弟邁幼槃以字行兄弟以詩鳴江西有文集合三十卷邦之學士欲刊之以貽永久積數十年而未能也粵紹興辛未趙公朝議來守是邦期年政成民服其教慨然思以儒雅歸吏事命勒其書于學宮以稱邦人之美意昌言以鉉槩董茲職于是搜訪闕遺以相參訂晚得溪堂善本于前學正易歲又得幼

槃善本于其子敏行歲知溪堂出處甚詳敏行逮事其父詩律有典刑其編次是正可無恨矣刀筆方興士大夫翕然稱贊工未訖功而四方願致其集者日至以是知二公之名重當時欲見其書者惟恐後也問之鄉老無逸之交遊無非天下名士其後幼槃聲問寢廣與之並驅而爭先既沒之後為之傳序為之哀詞祭文者甚衆今未暇博詢而徧錄也特取舍人呂公之所書摹其真蹟于後庶幾因呂公之文而不失二公文行之實云

壬申冬十一月辛卯朔建康苗昌言題

右從事郎軍事推官宋砥右文林郎軍事判官陸旻右
迪功郎差兗州學校授苗昌言右中散大夫通判軍州
主管學事嚴仲遠右朝議大夫知撫州軍州主管學事
兼管內勸農營田使熊士鵬淳熙二年十二月陽夏趙
煒重修

謝康樂詩規模宏遠為一時之冠而玄暉詩清新獨出
又自有過人者後之善言詩者于二公蓋未敢有所優

劣也本中竊以為無逸詩似康樂幼槃詩似玄暉此平等之論也紹興三年秋自嶺外北還臨川去幼槃之沒十八年矣始盡得幼槃書于其子長衲所伏讀累日益知前語之不繆雖然幼槃與其兄無逸修身厲行在崇寧大觀間不為世俗毫髮污染固後進之師也其文字之好蓋餘事耳後之學者尊其行并學其文可也學其文不究其行則非二子立言之本志九月二十日呂本

中書

幼槃詩文不傳于世此本從內府借出時方沍寒京師
傭書甚貴需銓旅邸資用不贍乃自為抄寫每清霜呵
凍十指如槌幾二十日始克竣帙藏之于家亦足詫一
段奇事也萬厯己酉十二月十四日辛酉晉安謝肇淛
題

先大人書法步趨右軍故平日行似聖教草宵十七帖
獨真書最少即不肖果亦罕見此二冊乃先君己酉歲
服闋候補都門手抄謝幼槃先生集字畫端楷無一毫

潦草杲偶得于亡侄殘簾敗篋中手捧跽誦悲喜交集
嗚呼物經七十六年茲以無意中復歸于杲豈非在天
之靈有默相耶因重加修整謹識時日以傳子孫使後
來知余得時情狀能永永珍惜未必非孝思之一端上
元甲子嘉平月朔不肖男杲拜手敬書

甲子臘月一日青門翁晨過手捧二大冊踵趾重繭若
不得前遙呼曰我昨日自猶子宅拾其遺集得先方伯
手錄宋謝幼槃文集言未已飲聲欲噍蓋喜極而轉恐

也余因得受讀省親細楷精繕無一毫錯伍自記云需
銓旅邸借內府秘本深冬沍寒窮二十日錄成合三萬
餘字時為萬厯己酉赴補冬官之日也迄今七十有六
年手澤如新後人撫栴櫨而興感能禁青門之捧而欲
泣耶頃讀福唐相公叙謝公北河紀亦稱公入都時時
借內閣秘籍抄填校勘可知公方銳進之時汲汲芸窓
素業無一毫熟中撫仕之念俯念今古是何等品物耶
謝幼槃名在崇寧大觀間以皜然不淄見稱呂舍人本

中章章有述公目中豈真以其詩文為模楷顧自有欽
崇之道耳惟青門擴其意未必不當謝家之寶訓哉東
山後學黃晉良頓首敬跋

信生十餘歲得讀先生五雜俎一書其羅籠名物錯綜
天地真曠若發矇晚復盡窺先生諸刻浩如淼如未易
究其涯涘也曩與先生同時者經濟推崇相董先生淵
博推能始曹先生先生與之頡頏而會集其長蓋三百
來吾鄉先進中一振奇君子也世運而往典型凋謝何

幸得覩遺墨于烏衣舊巷中王氏通天帖不得專美于
前耳甲子臘杪後學林佶敬識



謹案卷七第五頁前五行北窻歌枕颯涼風按宋
元詩會颯涼作傲清

第十一頁後七行漿搖齊指金山寺按宋元詩會
齊作但

第十二頁前一行他年來訪結菴地吾與此江春
水盟按宋元詩會結菴作誅茅江作鄉

--	--	--	--	--	--	--	--